



PARTIT OCCITAN
BP. 31 - 16270 ROMASIERAS
partitoccitan@free.fr
<http://partitoccitan.org>



Carcassona, lo 14/09/03

PEL CONSELH CULTURAL INTERREGIONAU OCCITAN

Las “Assisas de las Lengas de França” se tenon mentre que lo government sembla voler aprigondir e balhar mai de vam al processús de decentralizacion. Lo president de la Republica apara la diversitat lingüística al nivèl internacional. D’un autre band, l’article 2 de la Constitucion, lo refús de signar la Carta Europèa de las Lengas e d’unas mesuras legislativas fan entrepacha a tota evolucion de la politica lingüística sul territòri de la Republica.

Per dire de demorar pas a las declaracions d’intencion e per evitar los blocatges, lo *Partit Occitan* prepausa la reconeissença juridica del fach occitan, tant dins sa globalitat coma dins sa diversitat¹ : dich autrament, la presa en compte de l’identitat especifica dels territòris e Regions d’Òc, condicion fundamentala del reviscòl d’un “Sud” dobèrt, mas fòrt de son especificitat.

A tèrme, s’impausarà una novèla definicion dels limits territorials de las Regions Occitanas, per dire que se pòsca exprimir plenament la diversitat de lors territòris.

Empacha pas que la realitat occitana se pòt concebre, uèi, sul terren de l’interregionalitat, l’ensemble de las Regions d’Òc estent destinat a venir dins l’encastre de l’Union Europèa, pel mejan d’una “Comunautat Occitana”, una Eurò–Region vertadièra, amb plen exercici de las competéncias necessàrias a son desvolopament economic, social, cultural e lingüistic.

Sul plan del cultural, lo *Partit Occitan* prepausa de **transferir a las regions concernidas las competéncias seguentas** :

Politica de la lenga e de la cultura occitanas

En audiò–visual creacion e gestion de “cadenas regionalas” cargadas de la mesa en òbra d’una politica de desvolopament de la lenga occitana.

Dins aqueles domènis, las Regions devon poder beneficiar, sul pic, de competéncias de nivèl, pel mens reglementari (fins a l’adopcion de “reglaments autonòmes” al sens de l’article 37 de la Constitucion). Aquel transfèrt de competéncias deu èsser acompanhat del transfèrt de ressorgas budgetàrias necessàris a lor exercici, dins lo respiech de l’autonomia financièra de las regions.

A comptar del jorn de uèi e independentament de tota altra modificacion d’estatut e dels limits territorials de las regions, per assegurar l’exercici de las competéncias ligadas a la lenga e la cultura d’Òc, demandam la **creacion d’una collectivitat d’estatut especial : lo Conselh Cultural Interregional Occitan**.

Aqueste integrarà las Regions e territòris d’Òc : Aquitania (levat Iparralde), Auvèrnha, Lengadòc (levat Catalonha–Nòrd), Lemosin, Miègjorn–Pirenèus, Provença, los departaments d’Ardècha e Droma, la part occitana de Charenta.

Aquel Conselh aurà de relacions privilegiadas amb la Val d’Aran e las Valadas occitanas de l’estat italian.

Aquela coordinacion dels decideires territorials permetrà l’elaboracion de las politics necessàrias al desvolopament de la cultura occitana dins lo sector editorial, de la produccion culturala, de la radiò e de la television. Sola, una apròcha decentralizada e interregionala de la question culturala occitana pòt permetre de menar una politica coordonada en matèria culturala a l’escala del territòri occitan.

¹ Contribucion del P. Oc al debat sus la descentralizacion: <http://partitoccitan.org/regional.htm>